

永新縣志卷之四

賜進士出身資善大夫南京禮部尚書致仕邑洞麓耄史尹臺輯

賜同進士出身文林郎知永新縣事嘉定龔錫爵校

宦績第八

賢縣令丞簿尉巡檢
賢學官賢武勳附

縣令三國陳省躬南城人射策拜永新令治政嚴明下毋敢欺時郴衡盜入境戍兵死傷相籍省躬出府緡市棺瘞之守以符讓其專省躬駁覆云開官庫取官緡買官地葬官軍令何名爲過守竟屈不能難

唐賀憑會稽人集賢學士知章之後會昌四年以

永新縣志卷之四

一

著作郎任永新令有惠政秩滿當去邑民遮畱之遂擇邑良坊家焉今其後播分列邑科甲世盛於郡中

南唐制置使李元清濠梁人天成中來任是時民苦夏稅準見緡元清奏請匹帛議直折錢千著爲令民得便輸無擾

耄史曰李元清南唐謀臣也舊志特善其貢帛進緡之請此特一常吏事耳余考唐餘紀傳稱元清故趨捷善走常獨密入梁宋偵事人無有知者後主以永新湖南比界命爲制置使元清每數月一

託疾微服入湖南境中敵動息輒先知之故永新
累年寧晏邊境絕他擾其隱功在一邑卽準緡事
豈足道哉最後江南入宋元清誓不更仕宋以故
官召之僞辭失明召驗至揮刃及頸目不爲瞬於
虜其亦奇變蹈義之節士非眾常所可窺識者夫
宋董衢酸棗人第進士乾德初以評事令永新時
同第六人分宰列邑各持名節相激勵治聲載一
郡性稍近酒然不以妨政好汲引後進邑士段鵠
顏儼輩並因其薦得第進士成名任滿百姓攀留
不能行官至殿中丞

永新縣志卷之四

二

張岐建陽人明道閒以進士知縣事治獄明允吏
不敢欺民有積逋稅至千餘緡者岐以次代補輸
之並免繫累人誦其德後遷祕書丞

史應用萊蕪人咸平中爲永新令始至卽以前宰
縣諸治政條目署大門外一邑肅然畏惕政以通
行無撓

元絳字厚之河南人景祐閒知縣事崇儒術善詩
文時有豪民誘少年飲博因計貲折取其腴田持
券據有之少年母訟官久不直絳爲辨歸焉累官
參知政事

侯彭老字思孺衡山人至和初由司門郎謫知邑事政績彰聞前後罕儷數歲復召入爲刑部郎中孫億字延齡分宜人進士知縣事吉民歲市縑六萬餘匹主外計者收帑錢供他費給鹽代縑直億發其姦吉租歲收四十萬斛漕臣意在厚斂億預戒庾吏定收十二以充羨守州約拒臺命出納一用倉式後徙知他州卒詔賜贈葬旌其能

郭奉世字少馮新淦人大觀初知縣事泰和民苦令虐訴大吏願得奉世更治其邑漕檄許之而永新民交爭辨弗肯從奉世乃卽兩縣界稅車佛舍

永新縣志卷之四

三

兼理焉尋以憂去仕終左祕書丞

周穎建炎初爲永新令惠愛浹民庭無稽訟紹興初召爲吏部員外郎

趙不愆字無咎紹興四年由左承事郎知縣事先是邑經兵亂井市爲墟不愆首建縣署次修學宮百廢咸舉諸司以聞詔再任累官至禮部郎中牛宏紹興十四年進士授永新令廉以律己惠以裕民尤注意庠校事秩滿遷祕書丞

張象先字紹祖浚儀人紹興十六年由右丞直郎差知縣事謹恪不懈終始嘗奏行經界法縣賦之

有定制多其力也

周嗣武字功父浦城人以蔭補登仕郎乾道三年令永新時邑豪姓與吏通狎閒啗宰以相墨染久因爲所持嗣武痛懲其姦豪姓懾服歲歉有不逞聚眾謀劫邑邑人懼奔告願先期避之嗣武不可乃白郡急請兵爲備下令勸民賑粟平糶盜遂自相解化卒無一致辜者仕終侍郎

邵朴字古民晉州人乾道八年由左承事郎差知縣事持行端謹辨獄精明以憂去累官正郎

黃希字夢得臨川人淳熙初令永新適摘山寇起

永新縣志卷之四

四

縣遭毒擾邑民散徙弗輯希至撫靖之人以悅定建春風堂于治後日吟咏其閒事不擾而政大行柴必勝錢塘人淳熙十五年由左司直郎差知縣事文學政績著聞一時

張洽崑山人嘉定十六年以進士授永新令先是縣治罹寇災洽建修廳署廊廡門獄規制一新有獄吏受賕乘閒訊囚撈笞使誣服洽亟執吏畀獄白郡鯨之約束閭右得其懽心寇將犯境知有備遯去

陳滌字洗心零陵人紹定四年由通直郎知縣事

秉性剛直聽訟明決士民頌服
梅玘嘉熙二年令永新始邑舊爲土城歲久頽墊
玘協謀郡別駕戴栩伐石陶甃甃治之民至今賴
焉
元知州完顏濤至元五年守永新下車首詢民瘼
咨吏弊剗荒剔蠹期月政化大行修葺學宮作新
士類會以憂行士庶涕泣攀慕不忍其去
李春字孟元桂陽人至正元年知州事政暇力學
不倦治崇大體首立譚烈婦祠風俗多所激勵不
三載卒于官民咸慟焉

永新縣志卷之四

五

趙大訥字默之東陽人至正六年知州事鋤豪剗
蠹不數月百廢興舉建廟學以作士治教大行致
歸士民甚思之

大明田盛字秀實吳元年任永新知州廉介有智
畧民經元亂逃移靡復盛多方循拊歸者咸獲安
堵視學校頽圯與守禦千戶俞茂協謀重建殿廡
門堂一新又割俸置祭器毖祀秩修其重學興教
可稱知政理先要矣

知縣烏斯道鄞縣人洪武九年州復爲縣斯道知
縣事廉靜有守民不忍欺文行焯著邑士多從受

經焉遺教傳布至今人誦而懷之

於仲寬黃巖人洪武十三年知縣事時有亂民因龍泉寇起一夕掠殺其鄰數家所千戶議悉兵屠勦仲寬力寢止躬率民兵襲執其魁數輩餘並得貫免邑人懷之有生子者多以其姓爲名

柯暹字彥暉池州人以進士授給事中洪熙元年改知州署縣事臨事朗闡眾議盈庭徐出一二語折剖之靡不怵服工古文辭暇召諸生講難經史鹽鹽忘倦所在署舍壇壝橋梁鋪遞咸飭治一新尤加意學校建禮殿講堂門廡齋舍庖庫秩然周

永新縣志卷之四

六

備遲自爲記後改知吉水縣事政益焯美以久任超陞浙江按察使

陳員韜臨海人正統二年令永新學識通敏政令嚴肅蒞政三月豪橫惕息境內翕然稱治仕終廣東左布政使子選爲時名臣

薛驥字元德華亭人任監察御史天順閒以言事謫永新令廉公有威豪強格志貧弱者賴以生殖未幾憂歸民不忍其去至今有遺思

李愷字仲康江陵人成化三年知縣事宅心寬厚平易近民小大咸德之秩滿陞吉安同知

馬崑字克昌平湖人成化間以進士令永新興滯
補弊政先大體民感而安之尋陞監察御史士庶
至攀舟泣畱焉

謝表字正邦忠州人宏治十七年以進士令永新
治政通敏材猷踔發時邑義山之南豪室恃險負
固賦獄多不應輸勾表伐山開道攝其豪就法人
無敢距行者仕終鎮江知府

柯相字元卿前知州暹族也正德十三年以進士
知永新縣事踰年江西罹逆藩之變邑苦兵餉交
棘人鮮固志相才識通敏處措有方士民悅感以

永新縣志卷之四

七

憂去仕終巡撫陝西右副都御史

胡偉字邦奇京山人正德辛巳進士嘉靖元年知
縣事才力强敏任政堅持靡惑興學勸農儲粟賑
饑百廢咸舉邑歲賦苦虛賊民以躄輸多流亡偉
疏奏量田更籍均其賦役命下豪右咸稱不便上
官多沮其議偉力爭之遂定計分都制籍因賦著
役不浹歲告成轉徙者復業民至今頌思有肖其
像私祀之家者

陸粲字浚明長洲人進士改庶吉士擢給事中博
學負奇才名震一時以諫忤權斥貶嘉靖十一年

改永新令治政嚴明吏肅民畏有姦黨十數輩螫
害良善廉其人重置之法時寇煽諸境邑不逞朋
附林起粲盡擒殲之不煩兵以靖尤厚士校禮耆
老倡鄉約以善民俗邑至今遵行焉尋引疾去民
思其德威蓋久不能忘云

沈珠字汝淵揚州人蚤受學湛元明先生之門嘉
靖間令永新治尙寬簡民服其公而愛其恕擢國
子監丞去

論曰長令寄一邑之命其受任亦艱重已茲邑肇
建千數百年以賢績著聞僅僅此數十餘人耳何

永新縣志卷之四

八

寥邈不幾稱也往代尙矣 明興二百年來若田
盛於仲寬之篤惠烏斯道柯暹之闔勤列古良吏
之林奚忤哉以近耳目所睹記胡陸蠲患一時民
到于今受其賜而柯先沈後無懈乃職抑庶幾賢
吏之選歟身沒政存宜人之不能忘焉故稍次列
其行事而治績非久遠靡斲者弗論著

宋_丞施興祖字克紹烏程人紹興十六年任廉介
多謀畫時禾山宿寇數百人嘯聚交煽旁縣爲之
震駭興祖單騎往諭寇皆感悔報以金帛峻斥之
自是皆化服爲編氓

元州同知張頭口至元戊寅任性廉儉不事表襮
秩滿去行李如其來時

大明梅春字景魁應山人成化二年由大學生任
永新丞誠心愛民民不忍欺

宋籙尹躬字商老邑人登宣和三年進士紹興間
主簿事作新縣學士以奮振後宰新喻大以能著
遷江西憲曹

丁南金字世用吳人紹熙元年任永新簿佐政勤
慎工詩與柴令必勝並著聲一時

元州判官陳汴至正初年任爲人端嚴有度崇儒

永新縣志卷之

九

術訟至立辨政績著聞遷守邠州

大明籙施得中奉化人正統間任邑苦灘石躡運
得中奏請折輸銀布民感其位卑而能先民之憂
後竟無有念是者矣故邑人至今誦得中之賢不
衰

宋縣尉張繼阮清河人慶元間任先是邑主客戶
數萬多齟齬亂法至盜興訟繁不可止繼阮習法精
吏事能推知民僞要本治政清廓囹圄爲之一空
性廉儉門絕私謁歷四考其操不渝

范應鈴開禧初任永新尉時縣寇甫平喜亂者紛

相驚擾應鈴廉得其主名猝治之後知吉州首舉
練兵足食諸務乃以漸去冗覈僞改罷其不可行
者遂平寇亂著成功

劉炎淳祐間爲永新尉性不習機智時郡守行部
至縣有邪比諷炎徇所好炎佯若不解意守銜之
後竟以他誣得罪去人固不直其守矣

宋巡檢王輝青州人靖康初朝廷招義兵輝應募
數立奇功授永新栗傅寨巡檢秩滿僑寓吉州淳
熙二年茶陵寇犯邑郡以輝驍勇檄禦之至勝業
鄉地險不可列陳輝身先奮鬪爲寇所得以刃脅

永新縣志卷之四

十

使服輝含血憤罵死之帥司以聞贈吉州刺史立
廟秋陂祀之

王師道兗州人任栗傅寨巡檢爲人沈勇敢戰紹
興末遏盜于吳村每射輒斃其酋追奔數里過伏
力戰而死憲司以聞朝廷官其二子

耄史曰士欲行志豈患位卑哉繼阮應鈴焯然以
邑尉著聲王輝師道官庀巡檢之猥冗乃能當職
不畏死褒祀卒及其身後而施得中僅僅一縣簿
耳仁言上聞民至今誦思不忘視穹廡而瘞位者
奚若矣此數人行事不可爲天下作吏者勸與

元學正陳質字尙古吳興人至元中由鄉舉任積學宏深持身端肅無諂容無厲色學者仰之曹裕字德宏吳人至正二年由鄉舉任風度灑落經史博通爲文雅有古法樂與諸生相講授去之日門弟依依不忍別

諭立至正六年任淹貫經史迪士有方以文學著稱于時

大明教諭賀守約字約東邑人洪武八年任以古學爲鄉邑倡人士傾嚮之事詳儒行

徐輔字良弼崇德人景泰三年任持己誨人一以

永新縣志卷之四

十一

正道善古文詩後以憂去

曹謙蘇州人成化閒爲學教諭通經史能詩文嘗編邑志頗存故實監司命鋟梓以傳

元訓導江澄至正六年任州學訓導捐己直倡州士建廟廡講堂興行鄉飲酒禮古道以振人士慕稱之

大明鄧經字宗經會稽人永樂四年以鄉舉任學訓導操行端謹問學該洽尤長於詩歌學士解縉方伯李禎咸相與倡和加禮敬焉

宋佳字子美鄞縣人宏治閒以鄉舉爲邑學訓導

博通羣籍秉執古誼師範端嚴振一時弟子望之
廩廩不敢少犯其教指引導後生善抽啟關鑰而
檢柙無稍貸假遠近咸高慕其風後擢國子博士
去邑薦紳大夫猶追誦久不能忘云
趙錫蘭谿人嘉靖間爲學訓導少受業章楓山先
生之門性端方矜氣節教士必先義利之辨外慕
澹然雅以繩矩自約束聞兄喪遂投牒去年八十
餘乃卒

陶益新會人嘉靖間爲學訓導醇雅清修誨學者
多稱陳白沙先生之教未幾以目疾乞歸士重惜

永新縣志卷之四

十二

之

論曰士興于師道之立三代而下能有振于是鮮
已河汾蘇湖焯爲濂洛開先非豪傑士之無所待
而興者與 國家建學立師其望之甚厚然夷考
師儒岌然不溺乃職何寥寥不多聞也將忽視其
職爲不足奮稱乎故自薄而人薄之陵遲漸靡豈
端使然也哉吾永新之來任斯職眾矣獨至今推
四明宋先生之爲教彼蓋非聲音笑貌可幾也夫
躬行以倡之明正學以開誘之斯士所繇化從其
本原要出之身耳豈宋先生後遂真無有能繼其

風者耶

大明武勳俞茂字子懋徽州人吳元年任永新守禦正千戶剛果有才畧修城池繕器械築教場練軍實始建所署規制悉由經畫初土寨曰符溪者叛服不常居民患之茂一夕駐馬龍溪橋令諸軍蓐食以聽乃卽夜二鼓銜枚行比明至寨分眾立破之悉擒縛其魁黨數十平民附寨居者一無所問鄉民大悅服爭持牛酒獻茂慰諭遣之尤尙儒文與知州田盛修建學宮勤費不遺餘力邑士至今興感殆武弁之傑然者

永新縣志卷之一

十三

高睿字穎明少孤長襲永新守禦千戶卽能攻諳韜鈴從征虔寇有功陞指揮同知宸濠之變都御史王守仁檄從中軍贊畫陞湖廣鄖陽守備轉署廣東都指揮僉事睿事母孝謹少師事劉先生端敬若嚴父雅好與賢士游工吟詠美書尺機智才謀爲武弁推先雖稍任氣閒不爲大吏所直然其制行蹕軼矣

唐鼎襲永新守禦千戶爲人篤慎嘉靖辛酉流寇掠郡諸邑巡守檄鼎從征至泰和冠朝里力戰矢盡爲賊所害巡按御史奏聞贈官陞廕二級立

廟死所祀之子文襲陞指揮僉事

論曰永新介荆揚二域之交邑雖偏隘然吳楚之襟吭也 國家建兵樹守帥官世延爵命品貴銀鉞其授任要不尠矣承平二百餘年上下嬉恬樹勳宣力之士寢無聞若俞茂高睿庶幾不瘵其職守已下此何没没也夫平居不思自振奮一旦有急卽奉身以殉固無救事變之猝及而況恇畏苟活尺寸不少效見假令黃馘槁項抑奚裨封疆之障倚其不仰慚世祿迄負 聖朝建置守禦之深託也邪

永新縣志卷之四

十四

人物上第九

列傳

列傳

五代蕭儼幼奇敏十歲詣廣陵以童子擢第烈祖任政授祕書省正字改刑部郎精研法比廬陵民有冤獄儼齋戒禱神竟雪之遷司門郎中判大理獄奏劾宣徽副使陳覺姦回亂政烈祖甚感悟未及斥而薨殂覺始不自安稱疾累月未出及宣遺制遽出儼劾覺端居私室以竢升遐請按其罪弗許初烈祖相吳禁私買奴婢至是馮延巳與弟延魯於遺制中弛其禁儼曰此非大行之命必延巳

等所爲者昔延魯有此請先帝訪臣臣對言陛下
爲吳相時聞民粥男女立出府金贖歸之故遠近
懷德今臨祚卽反之可乎先帝斜封延魯章抹三
筆持入宮此必尙在及索之果得遂擢給事中後
主嗣位儼入白事後主方與嬖倖奕儼前請斂局
後主怒曰女孰與魏徵儼曰臣不能爲魏徵陛
下亦非太宗矣儼方直不阿貴戚斂衽後主勅齊
王景決政羣臣惟樞密副使魏岑查文徽得白事
餘非召對不得入儼上疏極論不報後主于宮中
作高樓召侍臣觀之眾皆嘆美儼獨歎恨樓下無

永新縣志卷之四

十五

井問其故曰以此不及景陽樓耳貶舒州觀察使
孫晟防之以兵儼曰儼以諫爭得罪非有他志昔
君欲矯遺詔使太后臨朝當此時社稷幾危其罪
顧不重于儼乎乃今日反見防何也晟慚遽罷之
宋平江南遂謝病不出年七十卒

周彬自少刻厲誦讀不治產業其妻讓曰君兄弟
皆以田耕致饒而君獨翫故紙取困耶彬笑曰農
力田而士務學業各有執非爾所知也時南唐烈
祖鎮金陵招致文士彬獻所爲文烈祖善之會禪
代祀南郊彬著郊望論以獻辭指多所規諷署諸

衛巡官元宗在東宮介書辟置門下賜予優渥後以大理司直爲本邑令持法平直不阿民甚賴之秩滿郡疏畱久任至歷七考遷尙書郎卒郭鵬世業儒時南唐始開科取士鵬中第授楊子尉尋遷廬陵令轉大理屬曹與卿蕭儼同按南平王鍾傳夫人與僧姦事獄奏誅之人服其決子昭慶

昭慶襲父業博通經史篤志力行嘗擬元經作唐春秋三十卷治書五十篇辭多援古諷今時周師南伐江步日蹙昭慶獻經國論述沿江要害守禦

永新縣志卷之四

十六

之計元宗悅之授著作郎後江南附宋貢獻表章多出昭慶手人始有以窺其心矣李續字繼宗少不事生產專志儒業嘗讀書廬山學成游建業會宋師南攻丹陽潤州節度使廬絳辟續掌記授宣教郎江南旣入宋遂隱居不出推所學教授鄉黨郡倅溫仲舒向敏中慕其賢皆勸之仕終不起年九十餘卒

宋尹承諤初事南唐中主爲衙將嘗陳便宜禁私謁後主時授本邑制置兵馬監押將士樂爲之用及江南平首奉吉州牌印入宋授左侍禁太宗嗣

位轉供奉官會計邊運頗能潔己奉公太宗嘉之
令巡環慶奏商稅欺弊上因使按其事得吏盜官
錢積計十餘萬緡死者二十人遂勅天下凡正官
盜錢無問多寡皆處死法自承諤始也時稱爲能
吏

段鵠字正己爲唐丞相文昌後文昌四世孫成式
刺吉州其孫翊仕南唐爲永新令因寓家邑西鄉
鵠其裔也少師事廬陵劉鶚爲文博綜經義事詞
有據登端拱二年第以大理丞判大名府甚爲執
政向敏中所知子惟億惟修俱先後登第惟億任

永新縣志卷之四

十七

靈山令惟修慶歷中除殿中丞廣州倅經畧廣中
兵事討儂賊征交趾治餉多勞績仕終通議大夫
劉沆字冲之其先世景洪嘗有隱功於邑因自名
所居北山曰後隆世傳其下有唐相牛僧孺讀書
堂父素卽故址築臺號曰聰明沆母夢衣冠丈夫
稱牛相公來遂生沆及長倜儻任俠多奇氣擢天
聖八年進士第二人授大理評事通判舒州州有
大獄累歲停疑沆至立決之章獻太后建資聖浮
圖內侍張懷信督役嚴峻州將移疾不敢出沆奏
罷懷信遷太常丞直集賢院出知衡州大姓尹氏

僞作券奪其鄰孤子田沆辨狀罪治之遷太常博士累陟三司度支判戶部同修起居注右正言知制誥署吏部流內銓奉使契丹時虜館伴杜防強沆酒沆拂袖起叱之廷議恐啟鄰釁乃出沆知潭州改知和州召爲諫議大夫知江州時湖南蠻徭數出掠殺官吏以沆爲龍圖閣直學士知潭州兼安撫使許便宜從事沆大發兵至桂陽招降貳千餘人命其酋以官又募士兵捕餘黨斬馘甚眾已而賊復出襲殺守將左降知鄂州遷給事中徙洪州還知審刑院改知永興軍以龍圖閣學士權知

永新縣志卷之四

十八

開封府事數發隱伏權近畏避遂以尙書工部侍郎參知政事進拜同中書門下平章事集賢殿大學士上言近臣三弊多所中摘近倖頗不悅而仁廟益敬信之與文彥博富弼同心輔政會上不豫儲位未建三相皆宿禁中因請定國本以安羣志仁宗許之卒立英宗其隱功宏厚已元豐三年神宗覽故家裔臣奏思沆定策勛遂與彥博弼一時並加恩不以沆沒遺焉沆在相位僅踰年稍爲臺臣所攻乃罷觀文殿大學士出知應天府雖未久竟所施然當時賢才多所薦引歐陽修被讒出守

沆薦修唐史復得以翰林學士進用嘗勉富弼以盡瘁而期其大有所振立弼終身德之以刑部尙書薨于陳州喪過國門仁宗製挽章以賜詔贈左僕射兼侍中追封楚國公諡文安御篆碑首曰思賢之碑子瑾孫備僦俱先後擢第有聲

瑾字元忠沆冢子皇祐五年進士累官天章閣待制歷知瀛虔江福泰五州所至以能稱嘗築滹沱河竟事不自言功其他異政尤多

僦瑾次子旣第以文章著名善書追法古賢文士翕然宗稱之仕終徽猷閣待制

永新縣志卷之四

十九

左書言其先潤州丹陽人祖鄴唐光化初宦衡州司馬秩滿道經永新值時多故遂寓居邑逢橋家焉傳四世至孫顏擢第爲殿中侍御史書言顏從弟也繼登元豐五年進士任鄧州教授振學興材括廢田三十頃以膳生徒經術倡明士譽歸之後宰陝之平陸以寬得民蝗嘗過境弗入有詔褒嘉仕終朝奉郎監察御史慶延暮譽師召皆其族也慶延年十七登紹興戊辰進士秦檜欲妻以孫女慶延辭不就坐是久失調仕終承奉郎太學博士所著有澹軒稿胡應春序之曰觀其與晦菴書推

明義理問辨反覆必極其底止乃已則所重當世不但以文焉耳使得行其志見於事功其斥奸排佞震動人耳目豈止若辭婚權秦云爾哉邑宰趙奮夫亦稱其所上奏有契丹之信不可渝女貞之暴不能久以爲當時確論卒久事益驗其識蓋足多矣

謩字元規以春秋三傳舉第開禧乙丑進士爲人豪邁負志氣使金不辱於狄教國學能振士風嘉定己巳金人南侵以黃岡爲沿江要衝舉謩任廉察畱黃十年虜不敢南窺後以淮西提刑朝散大

永新縣志卷之四

二十

夫直寶文閣卒改贈徽猷閣民思其遺愛至祠而望奠焉有坦齋稿從弟譽以忠節著有別傳

師召登嘉定癸未進士爲人廉介靡阿比仕其操愈厲守新州郤舶貢不收委公俸不取秩滿請祠主管台州崇道觀

龍鐻字琢成乾德中任邠州守以仁廉爲政民感其德致羣鶴來翔之異子暹雍熙乙酉宏辭科任江州司戶其裔孫德厚起嘉定拔萃科任翰林承旨出守潭州有善政端平間復以舊官召用龍思其先鉅鹿人也唐末徙居永新數世至思祖

袞嘗隱邑東山著江南野史思舉熙寧庚戌進士
初受學於臨川王文公嘗爲釋了元作雲居藏記
蘇長公稱其筆勢超然大見推許時新法方行思
上文公書力言其不便遂忤意出爲建昌戶曹承
奉郎致仕後改宣義郎族裔溥淼升之皆以文學
顯

溥三舍法入學再薦登建炎戊申第任道州江華
簿儒林郎會昌令時尉兵作亂溥急捕其首論治
之臺撫嘉其有應變才薦擢節度判官

淼思裔累世攻儒至淼益振起其業嘉熙丁酉進
永新縣志卷之四 二十一

所著春秋三傳評授登仕郎誥詞以孫明復望之
再以所續唐書進上嘉其能扶正統得邵氏皇極
經世遺意命加授迪功郎誥詞又以劉恕勉之用
奏補選例仕新淦縣尉

升之字子崇博學好著述游真西山楊東山之門
兩試鄉漕舉陳愷帥九江重加禮聘任以事遂建
永新城築之議邑民至今賴焉奏名調臨川戶曹
京尹趙與權表監酒場嘗修中興政要書成與權
列薦循資授從仕郎除福建帥司節幹在幕修宋
帝學增釋二百卷再循資轉儒林郎史館校勘改

通直郎卒京邸姚希章狀其行與權取誥語表墓道曰忠勤先生郡守李義山援陸象山例立祠於學宮祀之

尹躬字商老宣和三年進士廉介不苟阿始簿邑繼宰臨江之新喻禮耆老正風俗不畏強暴民有去思改江西憲屬決獄至吉水有繫逋賦十眾男女至共貫一索聞躬至密置他偏宇躬廉知盡令開釋之所著有易解冬官解官終正郎

龍時蜚中紹興閒拔萃異科授翰林供奉時權宰專政蜚眾中詆議之無少避拜給事中操秉愈堅

永新縣志卷之四

二十二

後歷翰林承旨賜紫

張綱字德堅登進士歷官靜江司戶廣州司理參軍常德教授永平縣令福州通判還朝爲宗正丞出知郴州未赴卒積階至朝奉大夫綱在靜江時靈川有殺人獄歲久尸壞不決綱指其髮下傷立訊服濬渠爲陂堰溉田五千頃知永平善以威信化蠻獠創浮梁以濟湍險易鬼俗教之醫藥將代邑民及蠻酋相率詣帥守監司乞畱焉在宗司大爲宗子姓敬慕改郴入對言薦舉不及廉靜善最多出經營文體未純士風未篤詔書寬大而州縣

侵漁戰艦蠹敝宮祠泛濫民力征需弗支凡九事
上嘉納之家藏書萬卷捐金以梓謝尙書諤孝史
又自類編宋列聖孝治一百卷表上之所著有橫
江轂稿子潞淵

潞字東之兩領江西漕舉繼國子監舉蔭授鄱陽
簿改秩桃源宰擢倅八桂大尹尙書胡槻甚重之
知昭州條奏便民三事悉施行民有去思仕至朝
散大夫年九十卒所著有龍川集子樛

淵字明之力學有賦聲屢試薦首嘉祐閒蔭補迪
功郎初簿江華憲使胡獬羅致上幕京西帥楊九

永新縣志卷之四

二十三

鼎辟充帥幕旣至漕使趙方號知人首委以事後
宰新建方時爲制帥復辟宰江陵終承議郎所著
有東巖稿

樛字子修少承家學歷官所至有能聲丞相吳潛
薦之朝景定庚子宰茶邑適衡寇竊發倉廩匱詘
乃自捐貲糾壯士協官兵力守孤城以爲江湖屏
蔽論功進秩奉議郎賜緋終朝奉大夫帥司參議
劉彥登字允升由舍選登進士嘗校文淮南得士
獨盛後提兵討虔寇招撫餘黨郡境帖然仕終朝
請大夫漢陽知軍所著有竹溪集

歐陽旻字彥昭隆興初試恩中第任新化簿有異政嘗著盡心錄以見志進承務郎致其事去時宰有與相友善者止之弗可乃遺書稱其高風足勵貪激懦其卒也胡忠簡公銓誌其墓

胡幼黃字成玉咸淳甲戌進士第三人時伯顏會師南伐德祐嗣位冲幼宋取士止是科矣其榜狀元王龍澤次路萬里又次幼黃時有三不得之謠謂龍在澤飛不得路萬里行不得幼兒黃醫不得幼黃既第授節度推官宋亡遂退居山中創讀書樓日呻諷其中元世祖用畱夢炎等議令所在搜

永新縣志卷之四

二十四

求宋遺士以聞龍澤起爲監察御史獨幼黃要其同榜士豫章熊朋來安成劉應鳳皆避匿不出朋來應鳳第幼黃後又聯名皆江右士也時論躉之元龍仁夫字觀復博學好古潛心理道深探濂洛關閩之奧經傳子史律歷陰陽靡不精究官湖廣儒學提舉屢典列省文衡所得名士甚多號一時龍門晚年僑居黃岡嘗與呂文煥及呂氏諸子弟宴琵琶亭賦詩有江心正好看明月卻抱琵琶過別船之句坐客皆掩泣罷酒其忠義之能激人如是所著周易集傳十八卷立說主本義每卦爻下

各分變象辭占謂雜卦爲古筮書春秋傳所引屯固比入坤安震殺皆以一字斷卦義此類是也孔子存之以爲經羽翼初非創作其言蓋先儒所未發者鄱陽董真卿集周易會通於仁夫之說多取焉爲文章與廬陵劉岳申並名而奇逸流麗過之學者稱麟洲先生

馮翼翁字子羽弟獎翁字子將幼受學於其父魯山先生魯山博通羣書庭訓甚肅長又師水窻劉先生詣造益深兄弟同領延祐鄉舉人稱所居巷爲雙桂巷其後翼翁登第以科斗試賦擅聲授漢

永新縣志卷之四

二十五

陽縣丞歷官撫州守所著有春秋集解春秋大義士禮考正性理羣書十七卷通鑑小錄考索類要正統五德類要三十四卷古書正譌讀書纂要法家源流異政錄十一卷又合左傳戰國策史記漢書韓柳歐蘇八家爲文章旨要八卷所自撰詩賦序記銘贊雜著二十卷獎翁未第亦以文學與兄齊名魯山贈吉水州判官廬陵劉岳申誌其墓謂永新以三馮瑞其鄉翼翁子寅賓屬文蒼古峭拔書法精勁偁鍾王今有馮氏僅存稿蓋三世顯儒業矣

劉友益清江公非先生九世孫家貧力學嘗爲人
傭書以給膏火或竟夕危坐默誦不少休積十數
年經傳子史天文地志律歷象數靡不淹貫宋末
兵亂友益中刀伏積屍中閱夕里人求獲負歸遇
善藥得不死卜築山閒不與世接普通鑑綱目書
法五十九卷揭文安公序之謂昔之知春秋莫如
朱子世之言綱目者非深知朱子意如朱子之知
春秋者不能言能言未有若劉子綱目書法者也
書法之作積勤三十年寸較銖評其微詞隱義不
但啟千載之祕中蓋有亡窮之憂其志可謂遠也

永新縣志卷之四

二十六

已矣爲人外通內介神情瀟然年八十五卒揭公
復爲之銘墓曰百圍之木不爲斧柯蹄涔之水不
爲江河元有天下先生在野先生在野志在天下
百世之上先生此心百世之下先生此心先生不
作山高水深居邑西水窻學者稱爲水窻先生後
門人有賀善者隱居不仕嘗著綱目贊及書法序
人稱之今不及傳於世矣

吳師尹字莘樂登元進士授永豐丞大書廳事自
誓不欺政化大行秩滿當去民歌之曰我有田疇
我旣治之我有猺役誰其除之丞哉丞哉豈弟父

母更我戶籍免我荼苦子孫孫子與箠楚辭丞茲
去矣如何勿思受代將行適歲大歉府檄如他郡
乞糴師尹請之贛贛守重其賢爲出粟二千石助
焉民賴以多活復攝廬陵鞫死獄釋良民之冤者
六人後丁遷革之際歸隱連里之桂岡學者稱桂
岡先生子勤仕 國初有聞

勤字孟勤其生也父夢紫衣人降其宅初元政日
隳州里騷動勤列弭盜策上於守臣納速兒丁弗
用徙寓洪都有薦於平章道童者勤辭弗往旣
大明兵至乃忻然請謁其帥曰此真弔伐師矣署

永新縣志卷之四

二十七

官泰和不就後以明經授武昌教授預修 高廟
實錄畱翰林力舉楊文貞公自代改開封教授勤
一介不輕取予於學無所不究然非聖人之書不
以教人嘗見學者玩太玄斥之及自誦佛經學者
疑以問則泫然曰此先夫人遺命也敢徼福邪紀
善貝翱聞之曰是固尹和靖故事耳 成祖踐極
以胡文穆公光大薦其善書召見 命書 御製
永樂大典序例字幾萬餘勤神閑意定書至終紙
點畫無纖訛 上大悅解學士縉嘗稱其書曰行
草余或有少長至楷法不及吳老先生遠甚尤工

題跋有他人銳思所不能逮者所著有匡山六義
鶴鳴等集子善存亦能世其業

天明歐陽韶字子韶文忠公族裔洪武初薦授監
察御史時大祖皇帝威斷莫測日命御史二人
侍班刑賞有失中不諫止則罪之一日子韶侍班
上乘怒將戮一人他御史不敢前子韶趨進跪舉
手加額莫知所措辭但連呼曰陛下不可不可
天顏爲霽其人得從輕典後告老終於家

張叔豫字順動鋼之裔也發解江西第一以進士
選翰林庶吉士與修永樂大典大擅時名朝士多

永新縣志卷之四

二十八

重之後出判安慶平權量禁奸蠹進諸生講學不
倦居常蔬食無改禁垣清素郡人以張翰林呼之
坐註誤得直命督工房山邁疾卒豫問學充贍居
家孝友平生不苟取予精易學鄉士出其門者皆
有名於時又與李伯尙劉髦友善邑稱三君子所
著有忍菴稿藏於家

張景良以書領鄉薦始爲懷遠學教諭適成祖
皇帝詔舉天下教官學行優者入試充皇太孫
講讀官時廷試五百人拔其儁得八人景良與焉
授國子博士進四書直講仁宗嘉獎之授右春

坊司直郎 賜勅褒諭謝事歸省掃起爲順慶通
判時中官入蜀採辦以在東宮時嘗受學於景良
乃取府所斂民金五百兩遺之景良受焉悉以還
前所斂之民或難之曰公爲此孰若先拒之足全
公廉名良曰斯皆吾民膏血也豈忍借是以沽廉
哉言者愧服孫瑛以鄉薦教桂陽清介有祖風
李伯尙字尙翁介特有守通古文辭詩歌登進士
引疏乞還鄉侍養人交賢之所著有清溪文集藏
之家

永新縣志卷之四

二十九

受易於廬陵謝子方子方大奇之旣領鄉薦魁遂
不求仕究心經術窮極洛閩指要以教鄉邑之來
學者無不各成其材事母甚孝謹待寡女兄如母
迎養從兄之無後者四人課耕自食環堵屢空泊
如也歲饑疫民僵死蔽道髦率僮掩瘞時有遠歸
病劇者眾自舟舁棄里祠中髦遺以湯藥弗治橐
有遺貨乃求識其人者歸之有李姓人冒爲弟取
貨去因以殺弟誣其鄰指髦爲證被逮至傾產或
嘆曰行仁義乃得禍耶髦笑曰事固有然者矣平
居以聖賢爲師一介不輕取予學務躬行不事談

說其於道德性命之際終身蓋亶亶焉學者卽所居稱爲石潭先生所著有覆瓿集示兒錄易傳撮要行世髦四子俱仕顯而定之獨爲時名臣定之字主靜自幼天資絕倫書過目成誦父石潭先生自授以書不令作文字定之每私爲之一日偶病石潭往視之於簣間得所爲祀竈文及咏桃漿等詩心驚異自是乃稍敢以文進石潭歎其有八面受敵之才宣德乙卯領鄉薦明年會試第一廷試賜進士第三授翰林編修正統己未京城大水詔求直言條陳十事其一言號令之出宜公正

永新縣志卷之四

三十

無頗賞罰必以信其二言公卿侍從宜時常召見以觀其才能心術其三言降胡近京畿宜漸分移南土其四言宜以京官出任郡縣使民得蒙循良之政其五言宜倣唐制京朝官陞任時舉賢良自代其六言武臣子孫宜習韜畧其七言守令選任宜加察其八言宜鋤富恤貧其九言廷臣遭喪宜令終制其十言宜遏僧尼奏畱中不下歲己巳北虜犯蹕 景皇帝登極復上言十事一言戰陣二言守禦三言簡使臣四言遷降五言兵士六言守令七言選賢八言武臣濫爵九言總攬權綱十言

經筵進學皆深切時宜 上咸嘉納之壬申北虜遣使來 朝因邀我使往報言官謂宜遏絕之以防窺伺執政謂不往報恐開邊釁定之上疏屢千百言以爲宜暫遣使羈縻之使我得益修內治而徐爲之所是時 朝廷方欲從言官議以定之言卒遣使定之凡三上疏並存史局至今人誦稱之是歲陞洗馬丙子進右春坊右庶子天順丁丑改通政司右參議仍兼侍讀尋改翰林學士進太常少卿成化丙戌 命主會試考遂入內閣預機務亡何陞工部右侍郎仍兼學士隨改禮部左侍郎

永新縣志卷之四

三十一

兼官若故卒年六十一贈禮部尙書諡文安定之在內閣閒上密疏皆國家大計惜未究所施用其問學自六經子史下至稗官小說釋老雜技之書靡不周記成誦海內後先士博雅莫或及之其爲文數千百言立就雄渾瓌麗變化靡測雖機軸多出蘇氏父子而理道過之以是名聞天下擅一代文宗雖武夫悍卒亦無不慕傳焉所著有呆齋存續諸稿十科策宋史論行世

戴禮字本敬博學好古登進士上第上疏乞近地教職養母得衡州府學教授進士受教職者自禮

始抵衡課諸生有成法嘗典浙江試并考禮闈並稱得人陞代王府長史王專恣禮數以書諫不從則法其助威者久之王愈張甚妃及王子世孫皆逐外禮密疏論之上命世孫總府事築別第居王賜璽書嘉獎禮後歸赤貧躬耕有同榜士按部過其家禮方荷耒耜入門無沮色後卒門人鬻其書以葬族孫僖

僖字大節登成化丙戌進士拜南禮部主事陞本部郎中擢汀州知府汀民初經鄧茂七之亂株連多所誣枉僖力洗辯出之後以入覲卒於途汀民

永新縣志卷之四

三十二

思焉僖嗜學工詩文未仕時教里中士多成材孫有孚文學負時名官鄭州守

劉儁字克彥後以字行第進士授監察御史陞按察僉事所至風裁凜然有接其辭色者邪念自消讐嘗稱學莫先於義利之辨毫釐千里舜跖之由分也吾黨時當以此自省惕致政歸確守清白澹然絕干請人品稱先輩第一爲文雅暢多古意所著有木菴集

江玉琳字正夫少貧弗自給事母節婦劉氏至孝嘗誨童子於鄉塾學士解先生縉過見大奇之薦

補邑諸生有直指行部至縣拜謁先師不由禮
玉琳庭糾其失召至試所業深獎異之及登進士
授御史彈劾輒先權倖直聲岳岳振臺中尋陞按
察僉事京師人追稱其風裁呼所寓巷爲江家巷
云

蕭翼字體全登進士知潛山縣勤心撫字廢舉利
興邑故無芋翼自鄉載芋教民種食民因謂之蕭
公芋丁內艸歸父老遮道攀泣服闋改知長垣縣
時黃河泛溢民舍漂沒十八九翼身先眾役築隄
以捍河潰發粟賑其災二年民始定立廟隄上祀

永新縣志卷之四

三十三

之秩滿入京乞畱者數百人請弗可眾號慟而去
冢宰王公直嘉其績超遷順德知府數月病卒行
李惟琴一張

尹禮字內則以禮經登進士授監察御史巡按山
東憲紀肅振時廷臣以征麓川大冒功賞禮上疏
極言其弊丁內艸大臣薦起入京條陳八事皆切
時務賜勅褒嘉尋陞河南按察副使卒

劉昇字幼顯居城東七歲能詩及長工古文詞總
角赴鄉舉寧藩聞其姿偉召見問以經傳大義應
對咸通析欲畱賓館昇不可乃以宮硯玉筆格贐

其歸正統辛酉領鄉薦明年試禮闈不第居京開義館名士多出其門景泰辛未魁南宮廷試進士第二人授翰林編修性剛果不附人時北虜犯塞邊餉告乏上欲加賦昇率諸寮上疏願以本院官俸助餉憂歸都御史韓雍按部過其家咨邑利病人不敢干以私嘗署門云拙性憚煩客至休言公事夙心好古朋來但辯經疑其清修類此釋服以疾卒人士咸惜之

李鈞字許國以進士授兵科給事中憲廟登極首言五事又極言三事中及寵璫牛玉忤上意

永新縣志卷之四

三十四

謫綏德州判官鈞不鄙夷其民出小學儀禮諸書教之俗以馴化適虜猝寇邊芻糧弗給鈞從容措畫事集而民不擾陞荆門州同知遂不赴有綏德集若干卷子輅能世其家學

左鼎字周器敏悟絕人雄辨喜任氣與其族兄輔同第進士鼎拜監察御史風裁凜然京師有左鼎手之稱巡按山西遇北虜大侵邊上旣蒙塵遂分眾窺山西鼎聞警卽募兵扼險死守虜知有備引去後遣使議和鼎馳奏譬以宋景德靖康閒事眾踴其議久之上復辟念其功乃自廣東參議

召還拜都察院左僉都御史方期大用之遽被疾不起所著有立齋集輔字良弼後亦授御史以言事謫知閩縣陞泰州知州卒

劉敷字叔榮始受學於叔父善善由鄉舉爲工部主事以抗中貴下禁獄後擢郎中著廉聲卒官不能治喪時議躉之敷舉順天鄉試登進士授南京監察御史巡江同差錦衣官校虐民奏革之平江賊有功陞湖廣僉事歲荒多所賑活歷貴州副使湖廣按察使起薹改福建按察使陞左布政使覲京值星變條奏十有二事多中時弊陞右副都御

永新縣志卷之四

三十五

史巡視浙江時海潮暴溢敷禦治有方奏遏中貴築海堤之擾復陳地方十事 上皆嘉納之改撫湖廣以藩封營繕工侈奏定費式給直令自修遂著爲例靖州苗亂 勅進討破賊六百餘寨捷聞蔭子一人爲錦衣百戶轉左副都御史引疾歸再起進右都御史掌院事風紀肅然後以疾乞休有楮幣之賜敷爲人氣度宏厚其得君行志抑材績有以致之矣卒於家 上遣官祭葬焉子袞從孫孔愚皆有聞於時 袞字廷延性孝友嗜學不以貴勢自浼登宏治癸

丑進士時貴要多父舊交表絕通謁之迹授行人
勅遣廣東犒軍道卒

孔愚字可明弱冠以禮經魁鄉試念母李矢節侍
養十餘年不赴春官嘗受學王陽明先生之門嚮
往得其指歸後就教定海造士有方捐餼以資貧
者兩典文衡皆稱得士擢寧遠知縣遷學厲士殄
劇寇有功尋卒於官孔愚博學善詩文有蘅汀集
馬聰字體哲登進士授監察御史 英廟回鑾疏
請 景皇帝避位謫處州推官決獄不泥成案盜
聚銀場謀劫官庫聞其按部至遂迎於道聰從容

永新縣志卷之四

三十六

省諭之反側以安撫按交薦其能後卒於官屬續
書二言遺其子曰貲不必計饒乏惟其人之賢命
不必論修短惟其心之無愧於天其制行可概見
矣從弟體乾

體乾以進士知靈璧縣陞御史疏論錦衣指揮門
達之姦謫華陽陞同知黃州事懇疏乞歸薦紳士
高之從子鉉

鉉字孔任登進士授工部主事差管遵化鐵廠律
身廉潔治事精嚴時役夫多疫痢鉉親治藥活之
擢廣西參議會古田盜起自將往勦之斬獲過半

歸過伏死兵中事聞 詔贈參政諭祭有奮不顧身之褒錄其子效才入監效才後任衡州通判有政績

吳綽字主寬登進士授監察御史陞廣西按察副使進按察使所至吏不敢欺民以無冤宦止外臬人惜其不大究於用云

湯清字汝正登進士授刑部主事遷員外郎陞湖廣按察僉事奉 詔平荆襄賊有功蒙錫賞性廉介不苟事平以勤瘁嬰病引歸其卒也諭德劉戩碑其墓清族子治博學好修用貢歷益府教授致

永新縣志卷之四

三十七

歸多著述有子朝珮舉鄉任繁昌知縣

賀深字宗濬以鄉舉任蘭溪教諭聘典順天文衡稱得士嘗念兄弟分異欲效陳江州鄭浦陽家法合千指同爨遂辭官歸士大夫高之子位官府同知廉靖有父風

李珪字用獻登進士授禮部主事轉員外郎起躋陞郎中逆瑾擅權欲羅致之不就遷曲靖知府道卒子儼

儼字民望登進士授行人疏諫 武廟南巡忤旨杖瀕死調國子學正嘉靖初起拜監察御史奉

命巡應天畿甸肅清人以真御史稱之報命乞
終養撫按交薦不起居鄉做行藍田約法倡後生
講學不爲虛論年八十餘卒鄉人祀於社及鄉賢
祠從姪承芳承緒皆先後登第尋卒
賀寬字懋教登進士授成安令改東陽治行焯著
擢監察御史疏斥權璫風采振臺中遷四川按察
僉事聲威甚著卒於官

吳期英字中順資性敏異博極羣書登進士歷官
禮部員外郎謫同知六安州改泰州抗中貴辯疑
獄進平樂同知因俗爲治民畏懷之除守思恩遭

永新縣志卷之四

三十八

土夷兵亂新建伯王守仁疏薦其有守孤城之功
未究用尋卒性度灑落詩文力追古調嘗題郵亭
及過山驛諸詩詞爲世傳誦所著有南溪集
尹袞字舜章舉鄉試授壽寧令作勸善詩教境內
聞者皆知感從陞夔州府通判視採皇木民苦
艱運袞禱於神水忽大至漂木自下抵江歲饑盜
起捐俸助賑民得全活寇尋弭夔人爲立生祠遷
守綿州廨獲瘞金以輸公帑代民賦綿人製去思
碑擢刑部員外郎遷福建運同致仕絕跡公庭鄉
人稱其篤行弟襄

襄字舜弼生有異質年二十舉鄉試第一人登進士改翰林庶吉士授編修同考禮闈修錄遷侍講尋進司經局洗馬每直經筵意必存諷諫一日進講尙書說命至官不及私昵有旨問講章誰爲者人交危之襄不以少動時稱講官之獨出者未幾竟卒在廷咸惜焉襄性醇雅端靜爲學沈思力詣事袞尤謹居常不問治生其志慕高遠矣所著有巽峯集子祖懋

祖懋字德卿童髻英敏過人隨父遊學京師燁有文譽歸領鄉薦登進士歷官廣東參議四川提學

永新縣志卷之四

三十九

副使罷歸刻意詩文有峽陽稿

甘公亮字欽采登進士授兵部主事時逆瑾擅柄疏乞改南便養在刑曹讞獄明允時疫親視囚醫藥全活甚眾 乾清宮災疏陳八事又請建儲不報擢守惠州罷橋鐵稅擣劇寇巢奏設和平縣惠賴以寧歸田四十年足不涉公庭究心理學雅以孝友力踐爲宗所著有蓮坪藁南嶽風韻集藏家孫雨今選翰林院庶吉士

賀縉字朝卿祖溫舉鄉任曲江令有政績縉承家學性剛介不阿登進士授工部主事改兵部擢職

方員外郎經理上谷雲中邊備冗冒多所裁抑轉
武選郎中時倖功被褫者夤緣權璫求復縉執議
不撓兩抗疏忤 旨告改南儀制郎中擢陝西參
議尋卒人多惜之子謹新慕學能詩從子謹端舉
鄉任嘉興通判不弛其家問

蕭樟字國材領鄉薦署江山學尋登進士除知莆
田起黷改四會平獠寇士民肖像祀之陞刑部主
事持法果峭適大禮議興援古以破羣論疏奏不
報遂同朝臣伏闕請 旨杖瀕死改治南曹斷獄
不避貴勢時稱鐵漢嘗建言五事又上言李侗從

永新縣志卷之四

四十

祀尋遷曲靖守不赴邑令陸公粲行政每咨訪焉
所著有秋山集從子坤文世其學
劉夢詩字子正父桐舉鄉教夏邑擢知漳浦泰順
二縣民歸其德夢詩年十八領鄉薦登進士授刑
部主事卽以發摘姦伏著聲時有莫犯小劉之謠
大駕南巡抗疏乞畱不下改南工部主事督造戰
艦綜理微密逆藩之變卒賴之起艱轉刑部郎中
陞兗州知府威德並著士民懷服而宗藩尤爲之
歛輯遷河東運使剗革積弊 國計以饒夢詩素
伉直稍見嫉於時歸林數十載反益爲夷曠不以

貴自倨年八十卒後生爲之致哀有三遊小紀藏於家

賀鏤字邦器登進士由大理寺正任嶺南兵備僉事勦羅山寇有功遷副使亡何兩廣盜熾鏤帥兵扼其歸路首憇就擒再擢參政潮寇張璉復大煽鏤內佐籌策外總餽餉焦勞至不遑寢食以暴疾卒有詔追論其績贈光祿寺卿

耄史曰余列序邑往賢行事相業稱先後二文安盛矣經營中外抑有張綱劉歎左鼎數公皆斌斌自著其材能概之流俗所論非過與至夷考後先

永新縣志卷之四

四十一

人品之踔絕則標節高峻若蕭儼李續左慶延胡幼黃抱學閎深若龍仁夫馮翼翁劉友益劉髦儒雅含籍若張叔豫尹襄吏治廉平若吳師尹劉儁蕭翼此其人不可百世誦思哉就所成至抑庶幾古之無所待而能興者太史公稱高山仰止景行行止雖未能至然心嚮往之假令數君子而在余固願執鞭以從之矣